

Date – 05/04/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. ZPM hruaitu Pu Lalduhoma'n NDA emaw INDIA Bloc emaw zawm bik neih an tum lova, Mizoram tana ðha tur nia langah chuan tu pawh thawhpui thiam thei turin an inbuatsaih tih a sawi.**
- 2. MNF MP candidate Pu K. Vanlalvena'n Lok Sabha MP atana thlan tlin a nih chuan Mizoram sawrkar dinglai nen ram hnuk khawihah chuan hrui khat vuana an thawh dun theih tur thu a sawi.**
- 3. Tunhnaia Khawzawl district-a thlipui leh ruah sur nasa avanga chhiatna tawkte tanpuina tur pawisa chu nimin khan pek chhuah tan a ni.**
- 4. Lok Sabha inthlan thawh hnihna chuh tumte tana hming thehluh hun chu nimin tlai khan a tawp.**

<><><>

CM

Chief Minister, ZPM hruaitu Pu Lalduhoma'n NDA emaw INDIA Bloc emaw zawm bik neih an tum lova, Mizoram tana ðha tur nia langah chuan tu pawh thawhpui thiam thei turin an inbuatsaih tih a sawi.

Pu Lalduhoma chuan ZPM sawrkar chuan Lunglei khawpui kawng chu ngaih pawimawh hmasâ-ah a nei dawn tih Nilaini khan a sawi a, hnathawh ðan theih a nih veleh siam ðat a ni ang, a ti a. Lunglei tana hmachhawp lian an neihte chu sawi vek rem lo mah se kawngpui hmasawna tur chu ruahmanna thui tak lo kal tawh sa a ni, a ti a. Parliament inthlan zawh veleh siam ðha turin hna an thawk dawn tih sawiin Mizoram khawpui ber pahnihna a nih angin kawng tinrengah lang chhuak tawh se an duh, a ti a. Lunglei khawpuia Cabinet Meeting ðhutkhâwm hmasa ber chu Lunglei High Power Committee, Conference Hall-ah buatsaih a nih tur thu a sawi baw.

ZPM Leader chuan an Party-in MP candidate atana an vawrh chhuah Pu Richard Vanlalmangaiha chu Mizoram tana hmasâwnna hnathawhna tur project hrang hrang Delhi tlânga an thehluhte chak taka um zui thei tura an rin tâwk thu leh, India ram chung mai ni lo, khawvel hmun hrang hranga Mizo awmte pawhin an thlamuanpui theih tur inngahna tlak nia a hriat thu a sawi a. Mizoramin MP ðha tak a neih theihna turin an party candidate Pu Richard Vanlalmangaiha chu vote ðheuh turin mipui a sawm a ni.

Nilaini zana Vantawng Group YMA Run, Thenzawl Bazar Venga inkawmhona hun a hmannaah Pu Lalduhoma chuan, ZPM chuan sawrkar laipui zawm emaw do emaw an nei dawn lo tih sawi nawnin, a pawng apuia Delhi sorkar an do loh tur thu leh, thlawp theihna leh puihna awm chin zawng zawngah an thlawp tur thu sawiin, ram leh sakhaw tana him lo chinah erawh huaisen takin an dodal dawn niin a sawi a. Sawrkar laipuia sorkarna chelhtute pawl zu nih kher emaw lehlam pawl nih kher emaw tul an tih loh thu a sawi.

<><><>

MP K. VANLALVENA

Rajya Sabha member ni mek, Lok Sabha Mizoram bial inthlan atana MNF candidate Pu K. Vanlalvena chuan Lok Sabha MP atana thlan tlin a nih chuan Mizoram sawrkar dinglai nen ram hnuk khawihah chuan hrui khat vuana an thawh dun theih tur thu a sawi.

Nimina Pachhunga University College Students Union hruaitute nen an inkawmnaah Pu K. Vanlalvena chuan zirlai hruaitute zawhna chhangin, India sawrkar hian Myanmar atanga rawn ral tlan Zofate hi raltlanah a la pawm lo va. Mizote nena unau an nih tlat avangin MNF sawrkar kal ta khan India sawrkar thu leh hla dodalin rawn tlan thlate chu hmangaih takin a lo enkawl a ni, a ti a. An tana thlamuanna nih ve zel a tum thu leh sawrkar laipuiin a remti lo chung Parliament-ah pawh a auchhuahpui niin a sawi.

NDA-a BJP nena thawhho chungchangah MNF candidate chuan, NDA thawhpui chungin hnam leh sakhaw chungchangah chuan BJP thil tum dodaltu awmchhun a nih thu a sawi a. Lok Sabha atan hian mipui khawngaihna avanga thlan tlin a nih chuan he ram leh hnam tan hian a dinna a la pangngai reng a, Mizote sakhua leh hnam pawisawina tur chi chu a do zel dawn tih a sawi bawk.

<><><>

CONGRESS CAMPAIGN

MPCC Vice President Pu Lalnunmawia Chuaungo chuan Mizoram, hnam leh sakhua a himna turin Congress Party Candidate vote tlin a ngai, a ti.

Nimina Champhai Press Club-a chanchinbumite a kawmnaah Pu Lalnunmawia Chuaungo chuan India chu Ram Danpuiin mi tin zalenna a pek, Right to Freedom palzutna ram a ni tih sawiin a bikin hnam tenau leh sakhaw tenaute nekchepin an awm zel a, hnam tenaute nekchepna chu RSS-te atanga rawn intan a ni a, chung mite chuan India ram chu Hindu rama siam tumin a rukin thiam takin hma an la nia puhin tun dinhmunah chuan NDA-a thawkho, BJP leh an lamtangte chu an dinhmun a hniam zel niin a sawi.

Inthlanpui lo awm leh turah chuan INDIA-a intelkhawm, Congress party leh a thawhpui te'n hnehna an chan ngei a beisei thu a tarlang a. Hnam tenau leh sakhaw tenaute tan NDA chu him tawk lova ngaiin chu'ng mite dodal tur chuan Lok Sabha Inthlanpui lo awm turah BJP leh a lamtangte Candidate Vote lo tura mipuite sawmin, Mizoram, hnam leh sakhua a him zawkna tur chuan INDIA a tangho zinga mi, Congress Party Candidate Mizo mipuiten an thlan tlin a ngai a ni a ti bawk.

<><><>

RELIEF DISTRIBUTION

Tunhnaia Khawzawl district-a thlipui leh ruah sur nasa avanga chhiatna tawkte tanpuina tur pawisa chu nimin khan pek chhuah tan a ni.

Pathianni leh Thawhtanni a thli leh ruah thawk khan Khawzawl District chhungah chenna in, Biak in, ran in leh bungraw dang engemawzat a tichhia a. Hriat theih chinah thli leh ruah avanga chhiatna thleng 148 a awm a ni. Tanpuina sem chhuah dan tur hi district Bawrhsap Pu K. Lalrohlua hovin Bawrhsap Pisa-a Officer te leh Disaster Management & Rehabilitation (DM&R) Zonal Officer ten nimin khan an rel a. Vanduinah tawh chhungkuate hnenah State Disaster Response Fund (SDRF) inkaihhruaina danin a sawi angin tanpuina hi pek chhuah nghal a ni. Khawzawl DC Office-in tanpuina tur pawisa a neih bak hi Mizoram sawrkar chuan DM&R Department kaltlangin a rawn pek belh dawn tih he hunah hian tarlan a ni.

Pu K. Lalrohlua chuan District chhung khaw hrang hranga chhiattawkte tan tanpuina pek chhuah nghal char char a ni tawh tih sawiin Bank Account leh Aadhar Card number thelut tawhte hnenah pek chhuah hmasak a ni, a ti a. Tanpuina la dawng lo te pawh an Aadhar Card leh Bank Account number an theh luh fel hunah tanpuina an pek nghal vat tur thu a sawi bawh.

Tanpuina sumfai pek chhuah bakah hian Zonal Officer te'n an bial chhung theuha chhiatna tawh te pualin Silpauline an lo sem chhuak tawh a. Khawzawl Bawrhsap chuan thli leh ruahin in chung a tih chhiat sak te rangva mamawh dan la khawmin, sawrkarin a hriattir angin rangva mamawh dan hi sawrkar hnenah thlen a ni tawh tih a tarlang a, rei lo teah rangva te hi sem chhuah theih beisei a ni.



HOME VOTING

Aizawl District Election Officer leh Lok Sabha inthlana Returning Officer, Nazuk Kumar-i chuan tun thla ni 8, ni 9 leh ni 10-ah te in lama vote thlak bul tan a nih tur thu a sawi a, Lunglei district-ah chuan nimin atang khan tan a ni.

He thu hi nimina Lok Sabha inthlan inbuatsaihna leh ruahmanna hrang hrang chungchanga chanchinbumite nen an inkawmnaah sawiin Pi Nazuk Kumar-i chuan, inthlan hmasaa upa leh vohbik te tana ina vote thlak an tih chu chhinzawm leh a ni dawn, a ti a. Tun thla ni 8, ni 9 leh ni 10-ah te in lama vote thlak bul tan a ni ang a, Assembly inthlana kum 80 chung lam an tih erawh kha chu tun tumah chuan kum 85-ah an thlak tih sawiin in lama vote thlak ngai mi 874 an awm, a ti a; heng zinga 820 te hi kum 85 chung lam an ni a, 54 te chu pianphunga rualbanlote an ni a. Tun thla ni 19-a inthlan vote thlak turin inbuatsaihna peih fel thawkhat tawh a ni, a ti.

Aizawl DEO chuan Mizoram bial bik atan General elections observer pakhat, Police Observer leh Expenditure Observer pahnih ruat an ni, a ti a. Inthlanmaa mawhphurhna nei tur team hrang hrang te chu training pek zawh

tawh niin master trainer 24 te'n training an pe, a ti a; polling official Randomisation vawi 3-na chu tun thla ni 17-ah kalpui tura ruahman a ni tih a sawi. DEO chuan SVEEP (Systematic Voters' Education and Electoral Participation) chu vote tla a that theih na'n vote thlak tlemna hmunah a bik taka beihpui thlak tum a ni a, vote tam tak a tlak theih na'n theihtawpa tan lak a ni tih a sawi.

Pi Nazuk Kumar-i chuan inthlan hriattirna a chhuah ni atanga Model Code of Conduct (MCC) hman tan atanga tun thlengin dan bawhchhiaa puha inhekna an la dawng lo niin a sawi bawk.

Hetihlai hian vote thlak tura polling station pan thei lo - kum 85 chung lam (senior citizen), Covid-19 vei mek te leh pianphunga rualbanlote tana postal ballot hmanga mahni in chung luma vote thlak theih dan ruahman angin Lunglei District chhungah nimin atang khan postal ballot hmangin vote an thlak tan a. Lunglei District chu Lok Sabha 2024 Inthlanpuia Home Voting kalpui hmasa ber District a ni. Niminah Zobawk, Rahsi Veng, Rualalung, Buarpui-ah te Home Voting hi kalpui a ni.

Lunglei district-a upa leh vohbikte tan in lama vote thlak dilna hi Form 12D hmangin BLO te kaltrengin dawn a ni a. Home Voting dilna hi March ni 25 thleng khan hun hawn a ni a. Hemi hun chung hian dilna mi 55 hnen atangin a lut a. Dilna lut zawng zawng te uluk takin zirchian an nih hnuah dilnate hi pawm vek a ni.

In lama vote thlak buaipui turin Election Commission of India duh dan angin Polling Official 2, video thlalatu leh Police awmna team 4 din an ni a, heng team te hian nimin atang khan Lunglei District hmun hrang hrangah Home Voting an kalpui tan a ni.

In chung luma vote thlak buaipuinaah hian Block Level Officer (BLO) ten a tul angin ruahhmanna an lo siampui zel a, Political Party aiawhte'n an duh chuan vote thlaktuin a vote thlakna thuruk a vawn theihna chanvo bawhchhe si lovin an lo thlir phalsak an ni. Video thlalatute pawhin in chung luma vote thlak kalpui a nih chung hian uluk takin vote thlaktuin a vote thlakna thuruk a vawn theihna chanvo bawhchhe si lovin an thla an lo la vek a ni.

<><><>

LOK SABHA ELECTION 2ND PHASE

Lok Sabha inthlan thawh hnihna chuh tumte tana hming thehluh hun chu nimin tlai khan a tawp.

Inthlanpui thawh hnihnaah hian state leh Union Territory 12 bakah Outer Manipur nen bial 88-ah inthlan a ni dawn a. Inthlan chuh tumte lehkhah thehluh hi vawiinah endik a ni ang a. Jammu and Kashmir bik chu naktukah endik a ni ang.

Inthlanna turte hi Kerala-ah seat 20, Karnataka seat 14, Rajasthan seat 13, Uttar Pradesh leh Maharastra-ah seat 8 ve ve, Madhya Pradesh ah seat sarih, Assam leh Bihar-ah seat 5 ve ve, West Bengal leh Chhatisgarh-ah seat 3 ve ve leh Manipur, Tripura leh Jammu and Kashmir-ah seat 1 theuh a ni a. Tun thla ni 26-ah vote thlak a ni ang.

<><><>

POLL-VOTERS

Election Commission of India chuan tun thla ni 19 zing dar 7 atanga tlai dar 5 thlenga Mizoram Lok Sabha bial inthlanpui vote thlak hunah vote nei zawng zawng te vote thlak vek turin a ngen.

Vote nei si, chhan hrang hrang avanga Vote thlak Ni-a Voter ID Card ken tur nei lo te pawhin an nihna tichiangtu atan sorkar siam card chi hrang hrang hmangin vote an thlak thei dawn a. Chu'ngte chu - Aadhaar Card, ni 100 inhlawhna Job Card, Bank emaw Post Office emaw Passbook (thlak chuanna), Ministry of Labour-in Health Insurance Smart Card a pek chhuah, Driving License, PAN Card, RGI hnuai NPR Smart Card, Indian Passport, Pension Document (thlak chuanna), Service Identity Card (Central/State/PSUs/Local body/Private. Company), MPs, MLAs/MLCs ID Card leh Unique Disability ID (UDID) Card te an ni.

<><><>